

29. rati, me colunt, votorum tenaces. Qui ad liberationem a senio ac morte, ad me confugientes, enituntur, ii NUMEN istud totum norunt, et id quod supra spiritum est, opusque integrum.
30. Qui me norunt simul cum eo, quod supra animantia est, cum eo, quod supra Divos est, et cum eo, quod supra religiones est, ii obitus tempore quoque, devote animati, me norunt.

## LECTIO VIII.

ARJUNAS *loquitur*:

1. Quidnam est istud numen? quidnam id quod supra spiritum? quidnam opus, virorum praestantissime? et supra animantia quidnam praedicatum est? supra Divos quidnam dicitur?
2. Supra religiones quomodo quispiam *esse potest* heic in hoc corpore, o Madhuis interfector? Obitusque tempore quomodo cognoscendus es tu iis, qui sui sunt compotes?

ALMUM NUMEN *loquitur*:

3. Essentia simplex ac individua est summum numen; indoles supra spiritum dicitur; animantium geniturae efficax
4. emanatio operis nomine significatur; super animantia est natura dividua, GENIUSQUE supra Divos; supra religiones ego
5. ipse sum in hoc corpore, mortalium optime; et qui obitus tempore mei memor, defunctus corpore, hinc proficiscitur, is
6. ad meam naturam pergit sine ullo dubio; vel cuiuscunque naturae memor corpus suum relinquit in fine vitae, eam ipsam adit, Kuntidis nate, semper ad naturam istam conformatus.
7. Quare omni tempore mei memento ac pugna! Animum mentemque mihi tradens me adibis procul dubio.
8. Co-